

弘

簡

錄

弘簡錄卷之五

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之七

肅宗皇帝諱亨玄宗第三子母妃楊氏以景雲二年某月乙亥
生初名嗣升二歲封陝王五歲領安西大都護河西四鎮諸蕃
落大使仁愛英悟得之天然及長聰敏強記屬辭典麗耳目聰
覽不復遺忘開元中封忠王改名浚領朔方大使單于大都護
因奚契丹犯塞遙領河北道元帥信安王禕爲副御史大夫李
朝隱京兆尹裴仙先等八人爲行軍總管以討之行日設次光
順門命與百僚相見左相張說退謂學士孫逖韋述以爲社稷
之福英姿穎發儀表非常雅肖太宗及諸將有功歸之加授司

徒改名興立爲皇太子又名紹嫌與宋太子同復改今名上初
名李林甫議值壽王瑁母武惠妃方寵希旨以對立後懼不利
已數起革堅柳勸獄以搖之更遭楊國忠馮勢褻穢懼上英武
幾危者數四嘗密奏祿山有反相不聽及議親征玄宗語宰相
朕去秋已欲傳位值水旱不果今且令太子監國待事甫平卽
將高枕無爲國忠懼與貴妃謀間其事遂不行祇命總率諸軍
隨幸蜀留在後宣諭百姓父老數千遮道泣曰臣等世爲唐民
願戮力一心爲國討賊請留太子以圖收復若同上入蜀中原
倚離爲主玄宗聞之喜爲天啓令力士與壽王送其內人及服
御等物留後軍二千及飛龍廐馬以從仍令口宣汝好去百姓
屬望慎勿違之其西北諸蕃吾撫之厚今國步艱難必得其用
汝宜勉之莫以吾爲意又諭父老曰太子仁孝可奉宗廟汝曹

善輔之時以初聞遠親涕泣不從引馬欲西建寧王倓與李輔國執轡而諫收邊兵復二京此爲大孝溫情定省兒女之態不足爲牽乃回至渭北從行惟廣平建寧二王并將士纔二千人時便橋已斷無舟可渡號令水濱百姓願歸者三千餘過潼關散卒誤以爲賊旋乃知之收其餘衆自奉天而北夕次永壽百姓遮道獻牛酒有白雲起西北長數丈如樓閣之狀議者以爲天子之氣衆尚未知所適建寧勸趙朔方以嘗爲節度道且近士馬全盛從之戊戌至新平郡晝夜奔馳三百餘里士衆器械亡失過半所存僅一旅己亥至安定郡斬樂城新平守薛羽保定守徐穀庚子至烏氏驛次彭原太守李遵率兵迎謁隨進服御糧糗募甲士四百率私馬以助軍辛丑至平涼得監牧馬數萬匹軍遂振三輔百姓知賊已據長安哄言大軍卽日隨太子

至賊西北望塵起時或奔走戊申陳倉令薛景仙謀取扶風郡人康景龍殺僞宣慰薛總等率衆守之關輔豪右皆謀殺賊其勢少歛駐平涼數日會杜鴻漸魏少遊崔漪等遣判官李涵奉牋來迎備陳招集兵馬并倉儲庫甲之數上大悅司馬裴冕赴闕相遇亦勸治兵靈武以圖進取心頗然之遂發平涼有彩雲浮空白鶴前引出後見所憩屏宇黃龍井井騰空而去行至豐寧南覩黃河險固欲整兵北渡權保于此忽大風飛沙跬步之間不辨人物反向靈武風沙頓止天地廓清秋七月辛酉抵焉少遊預頓供帳悉皆完備冕與鴻漸從容進曰寇逆亂常毒流函谷主上倦勤大位蜀川阻險奏請路絕宗社神器須有所歸萬姓顛顛思崇明聖天意人事不可固違伏願殿下順其樂推以安社稷答以公等何急宜俟平寇奉迎鑾輿從容儲閣侍膳

左右豈不樂哉冕等凡六上牋辭情激切不獲已乃從以甲子
日卽皇帝位冕等跪上千萬歲壽曰自從今日宗社再安海宇
更生臣稽首舞蹈上歔歔流涕卽日上表入蜀後御靈武南門
下制曰朕聞聖人畏天命帝者奉天時知皇靈瞻命不敢違而
去之知曆數匪常不獲已而當之乃者羯賊煽亂天未悔禍聖
皇久厭大位思傳眇身軍興之初已有成命予恐不德罔敢祗
承今羣工卿士僉曰孝莫大於繼德功莫大於中興以朕治兵
朔方務其大者須安兆庶之心勉順羣臣之請敬崇徽號曰上
皇天帝昭告天地大赦天下改是載爲至德元載以杜鴻漸爲
兵部郎中崔漪爲吏部郎中並權中書舍人裴冕爲中書侍郎
同平章事兵馬使周泌彭元暉與前蒲州刺史呂崇賁各拜河
西隴右關內節度使改扶風爲鳳翔郡靈武爲大都督府上縣

爲望中縣爲上任薛景仙於鳳翔郭英又於天水皆爲太守丁卯逆賊害霍國長公主并永王妃侯莫陳氏義王妃閻氏陳王妃韋氏信王妃任氏及駙馬楊肅等八十餘人甲戌賊黨同羅部五千餘自西出降巳卯京兆尹崔光遠長安令蘇震等率官吏殺賊數千級赴于行在八月壬午子儀光弼合破賊於嘉山詔令旋師各屯河北拜子儀兵部尚書依前靈州大都督府長史光弼戶部尚書同平章事兼太原尹北京留守廻紇吐蕃各遣使請和親願助討賊宴賜遣之上所奉表巳達上皇遣奉冊書及傳國寶來赴九月壬辰幸彭原郡給復百姓二載郡同六雄縣昇紫望封故邠王守禮男承宗爲燉煌王令饒固懷恩送至廻紇和親冊可汗女爲昆加公主納以爲妃丙子幸順化郡見素等至巳卯斬潼關敗將李承光於蘇下十月辛巳朔日食

既癸未以軍興用度不足命第五琦立權鹽法權賣官爵及度
僧尼上素知房琯名拜爲兵馬元帥王思禮副之分兵五萬爲
三命楊希文劉貴哲李光進各將一軍收復京師辛丑琯與賊
將安守忠戰于陳濤斜敗績希文貴哲等降賊琯乃奔還顏真
卿乘平原渡河於是河北盡陷十一月辛亥河西地震有聲圯
裂廬舍張掖酒泉尤甚戊子廻紇引軍赴難與子儀同破賊黨
三千餘衆於河上詔宰相崔渙巡撫江南補授官吏十二月戊
子以王思禮爲關內節度郭英乂爲鳳翔太守諫議大夫高適
爲廣陵長史淮南節度兼採訪使賊將阿史那承慶陷潁川郡
執太守薛慤長史龐堅甲辰永王璘反擅領舟師下廣陵
至德二載春正月庚戌朔上在彭原受朝賀通表入蜀每有銜
命戒途將發必肅恭拜跪涕泗漣面左右侍臣罔不感動上皇

下詔以爲信可以光宅寰宇永綏兆民其令天下有孝悌彰聞
堪旌表者郡縣長吏採訪來奏甲寅襄陽太守李暉爲蜀郡長
史與將作少監魏仲犀各充劔南并山南節度使永王傳劉彥
爲丹陽太守兼防禦使憲部尚書李麟同平章事乙卯安慶緒
弑縣山辛酉置江寧縣李輔國譖殺建寧王倓甲子幸保定郡
丙寅武威郡九姓商胡安門物等叛殺節度使周泌判官崔稱
蜀郡健兒賈秀謀逆文城太守齊莊將軍席元慶等各討平之
二月戊子幸鳳翔郡議大舉括公私馬貶給事中李巖江華太
守李光弼大破蔡希德於城下斬首七萬及軍資器械郭子儀
又被崔乾祐於潼關收河東郡永王璘敗奔大庾嶺洪州刺史
皇甫侁殺之三月癸亥河西自去冬地震至是方止辛酉裴冕
罷以韋見素同平章事致仕苗晉卿爲左相遣給事中南巨川

往吐蕃議和親癸亥大雨至癸酉不止詔疏理刑獄甲戌方止
夏四月戊寅朔拜郭子儀司空李光弼司徒統諸節度乙酉歲
星太白熒惑集于東井五月癸丑子儀與安守忠戰于清渠敗
績退保武功表讓司空許之丁巳房琯罷以諫議大夫張鎰爲
中書侍郎同平章事杜鴻漸節鎮河西庚申追贈母妃楊氏爲
元獻皇太后秋七月己酉太白經天庚戌夜蜀軍人郭千仞謀
逆李岷討平之丁巳賊將安武臣陷陝郡八月甲申崔渙補餘
杭太守兼江東採訪防禦使己丑張鎰兼河南節度採訪處置
等使賊攻靈昌郡援兵不至太守許叔冀拔衆投睢陽癸巳大
閱諸軍丁酉改雍縣爲鳳翔縣陳倉爲寶雞縣閏月辛未賊攻
鳳翔節度使崔光遠行軍司馬王伯倫判官李椿率衆禦退乘
勝至中渭橋殺守橋賊千人追擊入苑中伯倫血戰而死椿力

窮被執賊大軍屯武功者聞之燒營而遁自是不敢西侵九月
丁丑上黨節度使程千里與蔡希德戰被擒燉煌王承寀還拜
宗正卿與廻紇葉護太子率兵四千助國討賊丁亥元帥廣平
王統朔方安西迴紇南蠻大食衆二十萬東向討賊用李泌叅
謀以李嗣業居前郭子儀居中王思禮居後屯於香積寺西北
壬寅與賊將安守忠李歸仁等戰大勝斬首六萬癸卯入收西
京甲辰捷書至行在百寮稱賀卽日轉告上皇遣裴冕入京啓
告郊廟社稷冬十月乙巳朔遣崔光遠灑掃宮闕撫安百姓選
今月十九日還京應祿供頓務從減省癸丑睢陽陷張巡姚鼐
許遠皆死之其大衆保陝者復爲元帥及子儀等大敗于新店
斬首十萬橫屍三十里慶緒等悉奔河北壬戌廣平王入東京
陳兵天津橋南民衆歡呼陷賊官達奚珣陳希烈張洎等三百

餘人素服待罪命中丞崔器鞠問禁之于獄癸亥上自鳳翔還
京給復五載遣見紫等入蜀奉迎上皇丙寅至望賢宮復得東
京捷書大喜丁卯入長安士庶泣拜不圖今日復見天日上爲
感惻素服哭於九廟焚所三日入居大明宮新置九廟主成告
享已巳以河南河東郡縣皆平封廻紇葉護爲忠義王約每年
送絹二萬匹至朔方交授十一月壬申朔上御丹鳳樓下制覃
恩遠近改宮省門帶安字者僞御史大夫嚴莊來降以爲司農
卿十二月丙午上皇至自蜀上具法駕幸咸陽望賢宮奉迎上
皇御南樓上望樓辟易下馬趨進蹈舞稱慶上皇下樓上俯句
捧其足涕泗嗚咽不能自勝扶持御殿親自進食控馬上爲攬
轡上皇撫背止之乃乘馬前導自開遠至丹鳳門老幼夾道得
覩二聖若不勝喜百寮班舍元殿庭伺上皇御殿苗晉卿率以

稱賀禮畢詣長樂殿謁九廟神主上請歸東宮遣高力士再三諭止甲寅拜晉卿中書侍郎同平章事大赦天下加封倣楚王實封二千戶郭子儀代國公實封一千戶韋見素幽國公高力士齊國公陳玄禮右龍武大將軍各實封三百戶田長文張崇俊杜休祥各二百戶晁翼國公李輔國成國公李遵鄭國公僕固懷恩豐國公李嗣業號國公李光弼薊國公王思禮霍國公來瑱潁國公魯吳岐國公崔光遠鄴國公李光進范陽郡公苗晉卿韓國公李麟褒國公崔圓趙國公張鎰南陽縣公並加實封復所改百司額及郡與官名一依故事改鳳翔爲西京西京爲中京蜀郡爲成都府官寮並同三京名號追贈李愷盧奕顏杲卿袁履謙許遠張巡張介然蔣清龐堅等官仍訪子孫加等號錄賜文武三品已上爵一級四品以下一階大酺五日進封

皇子傑趙王僅彭城王儻兗王佺涇王倕襄王侶興王偲杞王
侗定王已丑僞范陽節度使史思明籍兵八萬與僞河東節度
使高秀巖並送表降庚午斬達奚珣等一十八人賜陳希烈等
七人自盡張均免死配流合浦

乾元元年春正月戊寅朔上皇御宣政殿授皇帝傳國受命寶
符加號光天文武大聖孝感皇帝上固辭大聖二字不允乙酉
出宮女三千庚寅大閱於含元殿庭庚子冊張良娣爲淑妃二
月癸卯朔僞淄青節度熊元皓來降用爲河北招討使并授子
昱官爵乙巳上朝興慶宮奉冊尊上皇徽號曰太上至道聖皇
大帝丁未大赦改元仍載爲年功臣依品各官一子追贈死事
王臣減陷賊官罪一等醫士入仕者同明法例處分三月甲戌
改封假成王乙亥置山南東道河南淮南江南諸節度使補官

員六十人辛卯置太史監就承寧坊張守珪宅改名司天臺夏四月癸卯嗣號王巨尹河南充東京留守京畿採訪處置等使已酉冊淑妃張氏爲皇后辛亥新廟成備法駕迎神主納之甲寅享九廟有事圓丘大赦戊辰上進鍊石英金龜於興慶宮五月壬午停採訪黜陟置觀察使癸未夜月掩心前星戊子張鎰罷以崔光遠爲河南節度使季廣琛爲青徐等五州節度使令赴河南行營會計討賊庚寅立成王爲皇太子己未崔圓李麟罷以王璵爲中書侍郎同平章事上嘗不豫璵請立太一神壇於圓丘東命璵攝行祠事癸丑夜月入南斗魁戊午勅諸司減原僞授官等科條共事狀稍輕者並與釋放史思明復反殺范陽副史烏承恩秋七月丙戌鑄乾元重寶錢用一當十興開元通寶同行丁亥上妹寧國公主出降迴紇八月甲辰上皇誕節

至百官於金明門諸將皆來朝庚寅大舉討安慶緒於相州命
子儀光弼思禮叔冀廣琛魯炆及興平李奂平盧董泰北庭李
嗣業等九節度之師合步騎二十萬始立觀軍容之名拜魚朝
恩爲使癸巳大食波斯國兵衆寇廣州刺史韋利見棄城遁冬
十月乙未以濮州刺史張方須爲廣州都督兼節度使子儀破
賊十萬收復衛州獲安慶和甲寅上皇幸華清宮上送於灊上
壬申王思禮破賊二萬於相州十一月丁丑子儀收魏州以崔
光遠爲刺史十二月平盧軍節度使王志玄卒上遣中使撫慰
將士就察軍中所欲立者授以旌節高麗人李懷玉殺志玄子
推副使侯希逸卽以委之節度使由軍士廢立始此庚戌王師圍相州慶緒
食盡求救史思明率衆來援丁卯思明復陷魏州光遠出奔是
歲饑禁酤酒麥迴紇黑衣大食康國吐火羅葉攝烏利多并九

國首領皆來朝貢願助討賊令赴朔方行營衛滑等州婦人侯四娘等歃血請同赴義補爲果毅

二年春正月己巳朔御含元殿受尊號加乾元二字史思明亦於魏州自稱燕王僭立年號丁丑上祀九宮貴神宿齋壇所戊寅耕籍田丙申李嗣業卒于軍二月壬子望月蝕既止皇后上尊號丙辰月犯心大星三月己巳皇后祀先蠶壬申子儀等與思明戰不利九節度兵皆潰子儀斷河陽橋以保東京思明還屯鄭南數安慶緒弑逆大罪并崔孝哲崔乾祐皆殺之甲午兵部侍郎呂諲同平章事乙未苗晉卿王珣罷轉京兆李岷吏部尚書禮部李揆中書侍郎并戶部侍郎第五琦並同平章事丙申拜子儀山東河南等道兵馬元帥兼判東京留守尚書省事夏四月丁酉朔王思禮破賊萬人於潞城縣東直于嶺壬寅下

詔殘妖未殄國步猶艱自今常膳及服御等物並從節減停諸
造作并口勅處分以後非正宣並不得用中外諸務各歸有司
罷英武及六軍諸使追攝須經臺府如處斷不平具狀聞奏自
文武五品以上各舉賢良方正直言極諫一人兩省官十日一
上封御史臺彈事不須進狀共體至公以康庶政乙巳史思明
僭號稱帝五月丁亥御宣政殿試文經邦國等四科舉人秋七
月辛巳趙王傑爲天下兵馬元帥八月乙亥襄州將康楚元逐刺史
兼商州長史河北兵馬元帥八月乙亥襄州將康楚元逐刺史
王政據城自守九月甲午賊帥張嘉延復亂襲破荆澧朗復郢
峽歸等州商州刺史韋倫討平之戊辰更鑄重輪大錢川一當
五十以二十二斤成貫庚寅思明入洛陽陷汝鄭滑等州光弼
移軍河陽與諸將併力冬十月乙巳大破之十二月癸巳朔神

策將衛伯玉破賊於陝西疆子坂

上元元年春正月辛巳進光弼太尉兼中書令子儀弟寧郡坊
兩道節度使三月甲申建蒲州爲河中府同京兆設置官吏夏
四月戊申襄州軍亂殺節度使史翺部將張維瑾據州叛以來
填充山南東道襄鄧等十州節度觀察處置等使以討之丁巳
夜彗長四尺出東方婁胃間閏月辛酉朔彗出西方長數丈巳
卯大赦改元京師大雨是月不止米踊貴餓死委路至人相食
五月壬子呂誼罷癸丑以劉晏爲戶部侍郎勾當度支鑄錢鹽
鐵等使六月乙丑減重輪錢一當三十開元錢一當十汴羌寇
鳳翔崔光遠與戰于涇隴敗之秋七月丁未李輔國遷上皇于
西內丙辰流高力士巫州王承恩播州魏悅漆州陳玄禮致仕
九月甲午改江陵府爲南都官吏設置並同河中復南京爲蜀

郡冬十一月乙巳李光弼拔懷州擒安太清揚州都統劉展陷
揚潤昇等州

二年春正月甲午上不豫皇后刺血寫經命諸司疏繫囚乙卯
平盧兵馬使田神功生擒劉展揚潤平以崔圓爲揚州長史二
月己未党項寇寶雞殺鳳州刺史蕭悅李鼎邀擊之辛未夜月
食既戊寅光弼與思明戰于北邙山敗績走保開喜朝恩伯王
走保陝州河陽懷州復陷京師戒嚴上表自劾讓太尉中書令
授侍中河中尹晉絳節度觀察等使癸未李愬與呂諲不悅貶
爲袁州長史拜蕭華中書侍郎同平章事三月甲子史朝義寇
陝及青兗二州衛伯玉尚衡熊元皓連敗之遂殺思明自立夏
四月己未裴遵慶爲黃門侍郎同平章事壬午梓州刺史段子
璋反襲破遂州殺刺史嗣號王巨東川節度李奭戰敗奔成都

五月甲午思明將令狐彰來降授御史中丞依前節度滑魏德
貝相六州乙未崔光遠與李奐擊敗段子璋於綿州擒斬平之
李光弼來朝復太尉充河南副元帥淮南山南東五道行營都
統鎮臨淮秋七月癸未朔日食既大星皆見甲辰王芝生延英
殿梁一莖三花上爲作詩八月癸丑朔加李輔國兵部尚書自
七月霖雨至是方止上以災變屢見命於三殿置道場以宮人
爲佛菩薩力士爲金剛神王名大臣膜拜九月壬寅制去尊號
乾元大聖光天文武孝感等字唯稱皇帝乾元年號亦罷但稱
元年月以斗柄所建爲名建子月爲歲首停四京號

元年建子月上受朝賀如正旦儀遂朝上皇於西內癸巳曹州
刺史常休明敗賊將薛萼丙午衛伯玉敗史朝義于永寧己酉
朝獻太清宮庚戌享太廟及元獻皇后建丑月辛亥南郊己未

來瑱及史朝義戰于汝州敗之乙亥侯希逸又敗賊將李懷仙
於范陽建寅月甲申追冊靖德太子琮爲皇帝妃寶氏爲皇后
丙戌盜發敬惠二陵甲辰李光弼克許州戊申史朝義陷營州
建卯月辛亥大赦癸丑河東軍亂殺節度使鄧景山乙丑河中
亦亂殺李國禎戊辰淮西節度使王仲昇及賊將謝欽讓戰于
申州敗績庚午復起郭子儀朔方河中諸軍行營副元帥封汾
陽王壬申鄆州刺史成公意及黨項戰敗之建辰月丙戌夜月
有白冠甲午黨項奴刺寇梁州刺史李勉棄郡走丙申又寇奉
天時上不豫百寮於佛寺齋僧丁未放還左降官并一切流入
天下見禁繫囚無輕重一切釋放建巳月庚戌朔史朝義寇澤
州刺史李抱玉敗之壬子楚州刺史崔旆獻定國寶玉十三枚
因言楚者太子所封宜改是年爲寶應元年建巳月仍爲四月

餘並依常甲寅上皇崩于神龍殿上聞之不勝哀悽因茲大漸
乙丑詔皇太子監國丁卯帝崩于長生殿在位七年壽五十二
謚曰文明武德大聖大宣孝皇帝廟號肅宗葬建陵

冊曰靈武肇基丘民效順民重君輕兩言益信社稷之功
默存大易長子帥師丈人貞吉孰云非道而能自立千古
斯文同臻至一

天王 唐一之八

代宗皇帝諱豫肅宗長子母章敬吳太后以開元十四年十二
月十三日生于東都上陽宮初名俶自幼好學尤專禮易年十
五封廣平王仁孝溫恭動必由禮及長宇量弘深寬而能斷喜
懼不形於色玄宗特鍾愛之從狩靈武拜天下兵馬元帥推心
示信招懷流散比至彭原兵衆數萬值房琯子儀繼戰不利賊

鋒方銳屢來寇襲乃選求勇幹頗挫其鋒上慮獲寧士心大振
及師進討百官辭送步出闕門方始乘馬廻紇葉護入助接以
優禮恩信素結香積之戰大得其力既收京城令行禁止民庶
安堵秋毫不犯間賊殘衆保陝卽日長驅東趨號洛復大克捷
殲逆黨十之七八河南抵定兩都恢復在於數旬推功不受立
爲皇太子以豫州獻嘉禾改今名值兩宮不豫往來侍疾躬嘗
藥膳衣不解帶久之承命監國流涕而從張皇后以無子懼其
功高難制陰引越王係於內將圖廢立矯召入宮內使程元振
知其謀勒兵凌霄門以俟其至衛從入飛龍院至夕聞皇后于
別殿收係及內宦朱光輝馬英俊等鎖之伺肅宗崩元振等卽
迎於九仙門見羣臣戊辰發喪已巳柩前卽皇帝位乙亥進李
輔國號尚父擢元振右監門將軍流朱光輝啖庭瑤陳仙甫等

於黔中五月己卯朔又進輔國司空兼中書令庚寅追尊母爲
皇太后辛卯議行三年喪宰臣晉卿等請遵遺制至三十表方
允丙戌聽政改封宇鄒王适魯王李光弼臨淮王貶蕭華陝州
司馬以戶部侍郎元載同平章事改乾元大小錢並準當一民
始安之丁酉大赦加諸道節度使實封賜立功人號實應功臣
內文武照品加爵級如故事停諸州防禦使進封子邈鄭王
迴韓王追復庶人王氏爲皇后瑛瑒瑑皆返舊封昭雪棣王琰
永王璘王寅來瑱復任襄州刺史長流故刺史裴拔費州賜死
六月己酉朔臨于西宮不視朝以迄山陵凡辭見有事先臨而
後詣改豫州爲蔡州以避上名辛亥廢皇后張氏與越王係究
王側皆爲庶人辛酉封李輔國博陵王出居外第秋七月辛巳
封魚朝恩馮翊郡程元振保定郡皆開國公庚寅郭子儀自河

中來朝留于京師是月不雨至于八月癸丑方雨庚午夜西北有赤光亘天貫紫微漸移東北彌漫半天台州賊袁晁反九月丁丑朔進元振邠國公甲申裴冕議山陵事與元振異貶爲施州刺史甲午太州至陝二百餘里黃河清流輔國黨韓穎劉烜于嶺表尋賜死丙申遣御史大夫尚衡宣慰廻紇登里可汗率衆助國王寅大閱冬十月辛酉詔雍王适統河東朔方及廻紇兵十餘萬討史朝義丁卯夜殺李輔國戊辰諸軍進發同會于陝壬申次洛陽北郊甲戌戰于橫水俘斬六萬朝義奔冀乙亥收東京以郭英乂權留守丁酉僞節度張忠志來降賜姓名李寶臣李懷仙斬朝義來獻河北悉平

廣德元年春正月劉晏爲吏部尚書同平章事閏月戊申分河北地爲六授諸降將李寶臣領成德李懷仙領幽州薛嵩領相

衛等州皆節度使田承嗣魏博都防禦使二月甲午廻紇歸國
三月甲辰朔襄州兵馬使梁崇義殺大將李昭據城自固朝廷
不能制命爲山南東道節度留後丁未以兩朝歸附罷晦朔朝
百寮素服詣延英門通名起居夏四月戊寅朔改太州爲華州
太陰爲華陰縣庚辰光弼將張伯儀生擒袁晁浙東平六月癸
未封李抱玉武威郡王檢校司空河中王昂封邠國公檢校刑
部尚書同華李懷讓檢校工部尚書同日入省甲午朝恩自陝
州入朝上御達禮門同百寮往觀秋七月戊申羣臣同上尊號
曰寶應元聖文武皇帝壬子大赦改元祿山思明親族一切原
免租稅依舊每畝二升加元帥雍王尚書令副帥懷恩太保進
登里可汗功臣皆賜鐵參藏名太廟畫像凌煙閣丁巳懷恩子
瑒兼御史大夫充朔方行營節度使將大入河隴陷秦成渭三

州復入大震關陷蘭那河鄯洮岷等州盜有隴右之地九月壬戌朔懷恩拒命遣裴遵慶往汾州宣撫己丑吐蕃寇涇州刺史高暉以城降因爲鄉導冬十月辛未遂犯京畿自司竹園渡渭循南山而東丙子駕幸陝州六軍逃散射生將王獻忠叛賜豐王瑾等還迎之郭子儀往商州收合散卒得四千人丁丑駕次華州官吏藏竄無復供擬會魚朝恩領神策軍自陝來迎乃幸其軍戊寅吐蕃入京師立廣武王承宏爲帝逼前翰林學士丁可封爲制書辛巳駕至陝六軍使張知節烏崇福長孫全緒等率兵繼至軍威遂振從官亦由南山諸谷以赴行在鄜坊節度判官段秀實說白孝德引兵赴難與子儀合勢進擊晝則鳴鼓張幟夜多然火以疑吐蕃懼而遁去庚寅入京子儀留守壬辰元載判行軍司馬嚴武爲黃門侍郎第五琦京兆尹兼御史大

夫高暉奔至潼關爲守者李伯越所殺十一月辛丑朔太常博士柳伉上疏以戎兵數萬衆犯關度隴歷秦渭掠邠涇不血刃而入京師謀臣不奮一言武士不力一戰提卒叫呼劫宮闕焚陵寢此將帥叛陛下也自朝義滅陛下自以智力所能故疏元功委近習日引月長以成大禍羣臣在廷無一犯顏回慮者此公卿叛陛下也近三輔亦叛陛下始出都城百姓譴然奪府庫相殺戮四方又叛陛下自十月朔名諸道兵盡四十日無隻輪入關者獨一魚朝恩以陝郡戮力安能守社稷乎如必欲存宗廟社稷獨斬元振首馳告天下悉出內使隸諸州陛下持神策兵付大臣然後削尊號下詔引咎幸德勵行屏嬪妃任將相許朕自新改過卽募士西與朝廷會若以朕惡未悛則帝王大器敢妨聖賢其聽天下所往如此而兵不至人不感天下不服請

赤臣族以謝疏聞上思元振有保護功祇削官爵放歸田里十二月甲辰廣南市舶使呂大一反逐節度使張體大掠廣州丁亥車駕還京辛卯鄂州大風火發江中焚船三千艘民舍二千家乙未晉卿逾慶罷拜李峴黃門侍郎同平章事丙申放承宏華州一切不問丁酉朔方帳下殺僕固瑒傳首來獻懷恩聞之燒營遁入吐蕃朝臣稱賀上不受是月吐蕃陷松維保三州及雲山籠二城

二年春正月壬寅元振抵法配流漆州癸卯顏真卿充朔方宣慰使癸亥劉晏李峴罷以王綰爲黃門侍郎杜鴻漸兵部侍郎並同平章事第五琦專判度支及諸道鹽鐵轉運鑄錢等使置諸道常平倉量置本錢和糴丁卯郭子儀充河東副元帥河中等處觀察兼雲州大都督單于鎮北大都護時以安史平罷河

中節度及耀德軍二月己巳朔冊雍王爲皇太子癸酉朝獻太

清宮甲戌享太廟乙亥圓丘大赦戊寅裴冕轉運河南江淮已

未第五琦開決汴河夏五月戊午加置兩省散騎常侍四員階

正三品庚申楊綰奏罷歲貢孝悌力田童子等科六月癸未削

懷恩官爵秋七月己酉李光弼薨八月丁卯命王緝代爲都統

九月大雨自七月起不止洛水溢丙申詔徵河中兵討吐蕃將

發劫財吏不能禁丙午辛雲京檢校右僕射同平章事充太原

尹辛亥郭子儀充北道邠寧涇原河西以東通和吐蕃及朔方

招討安撫使己未嚴武攻拔吐蕃當徇鹽井兩城庚申命楊綰

知東京選賈至知東都舉

兩都分舉
選始此

辛酉李峴知江南東西及

福建道選事洪州刺史李勉副之是秋蝗食苗殆盡米斗千錢

冬十月丙寅懷恩引吐蕃寇邠州白孝德閉城拒守先鋒郭晞

敗之丁卯寇奉天京師戒嚴子儀屯涇陽挑戰不出十一月乙未懷恩與蕃軍自潰嚴方解丁未子儀入覲詔宰臣百寮迎於開遠門上御安福寺以待十二月乙丑領關內河中副元帥暢瑊爲河中尹是歲戶部計帳管戶二百九十三萬三千一百二十五口一千六百九十二萬三百八十六時租庸法壞始命以畝定稅歛以夏秋又因國用急迫苗方青卽征之以給百官俸祿號青苗至是始行之

永泰元年春正月癸巳朔大赦改元戊申授李抱玉僕射兼澤潞觀察鳳翔隴右節度和蕃等使四鎮節度馬摯副之癸丑罷岐州鳳翔縣併入天興二月丁丑出宮女千人品官六百人守洛陽宮戊寅党項羌寇富平挾定陵寢殿戊子河西党項永定等十二州部落內屬請置宜芳等十五州許之時勳臣罷節制

居京師皆無職事三月壬辰朔詔僕射裴冕郭英乂太子少傅
裴遵慶少保白志貞詹事賊希讓常侍暢璿尚書王昂高昇崔
渙侍郎李季卿王延昌賈至涇王傅吳令璠等十三人並待詔
集賢院間以文儒寵之上嘗有意容下而無聽諫之實左拾遺
獨孤及以爲恥上疏諫不能用庚戌吐蕃請和詔宰臣元載杜
鴻漸同盟于興唐寺是春大旱京師米斛至萬錢諸穀皆貴夏
四月己巳乃雨五月第五琦奏麥稔請十畝稅一如古法行之
二年民多流亡詔復停之六月甲申代州置代北軍平州置柳
城析通州石鼓縣置巴渠縣秋七月辛卯朔侯希逸爲副將李
懷玉所逐制以鄭王邕遙領平盧淄青節度大使懷玉權知留
後事九月辛卯太白經天時宰臣元載王縉杜鴻漸皆好佛上
問以果報事對曰國家運祚靈長皆宿植福緣所致雖時有小

臣列坐於席者百人夏四月庚子宰臣及朝恩與吐蕃同盟於唐興寺六月戊戌杜鴻漸入朝廣納貢獻因薦肝才堪任上姑息留知政事川旣爲劔南西川節度使杜濟爲東川觀察使封衛伯玉城縣郡王秋七月戊申朔散騎常侍于休烈檢校工部尚書知省事時勳臣昇八座多非正員以知省事爲名癸酉析道州延唐縣置大脣縣八月庚辰李抱玉來朝壬寅駙馬姜慶初得罪賜自盡九月甲寅吐蕃寇靈州乙卯寇邠州詔于儼率師三萬鎮涇陽京城戒嚴戊午于儼移鎮奉天十月戊寅靈州路嗣恭奏破吐蕃二萬始解嚴甲申減京官職田并宰京城士庶出錢以助軍乙酉醴泉出于櫟陽飲之愈疾癸卯上御紫宸殿策試茂才異行安貧樂道孝悌力田高蹈不仕等四科舉人十一月庚申復黃門爲門下侍郎昇侍中中書令正二品侍郎

正三品壬申京師地震其聲如雷十二月魚胡恩作章敬寺以資太后冥福命毀曲江及華清宮以給之衛州進士高郢諫不聽丁酉辛雲京來朝是歲河東河南淮南兩浙福建等道五十州水災渤海靺鞨廻紇党項皆來朝貢

三年春正月上幸章敬寺度僧尼千人二月壬午邠寧馬璘來朝三月乙巳朔日食壬申割恆州衛唐縣置洹州以靈壽恆陽隸之夏四月戊寅張獻誠有疾薦其弟右羽林將軍獻恭代已爲梁州刺史壬寅崔旰來朝加檢校右散騎常侍以滑毫節度令狐彰代之五月乙卯追諡故齊王僖爲承天皇帝祔奉天皇帝廟同殿異室妻張氏恭順皇后祔葬辛酉改桂州臨源縣爲全義縣癸酉地震楊子琳乘崔旰入朝襲據成都剽廷憂之戊辰遣還進檢校工部尚書改名寧庚午轉邛州刺史鮮于叔明

充東川節度使六月壬辰幽州軍亂殺節度使李懷仙朝命李
濟宣諭以王纘領鎮副使朱希彩知本軍留後秋七月五星聚
於東井占曰中國之利遣右散騎常侍薛肝使廻紇壬申崔寧
弟寬攻破楊子琳收復成都望日內山孟蘭盆賜章敬寺設七
廟神主書尊號於旂上百官迎謁光順門歲以爲常八月壬戌
吐蕃十萬衆寇靈武京師戒嚴白元光破之丁卯寇邠州馬璘
破之戊辰御史大夫崔渙以給青苗錢不平貶道州刺史加百
官厨料增舊五分之一庚午辛雲京卒改王纘太原尹朱希彩
幽州長史九月壬申子儀自河中移鎮奉天壬午吐蕃圍靈州
戊戌鳳翔都將李晟屠吐蕃定秦堡焚其積聚蕃人聞之釋圍
而去百寮稱賀始解嚴冬十二月己酉以吐蕃進入馬璘不能
制徙之涇州割邠寧隰方郭子儀將吏聞之謀作亂知留後

段秀斬兇首八人衆方定

四年春正月郭子儀白奉天來朝魚朝恩邀遊章敬寺甲申回河中戊子法司議宗室潁州刺史李岾專殺賜自盡乙未從福建觀察使李承昭議徙汀州於長汀縣之白石村黑衣大食國遣使朝貢二月丙辰夜地震有聲如雷者三辛酉徙湖南軍於潭州拜韋之晉潭州刺史湖南都團練觀察使江西魏少遊來朝封趙國公三月壬申京畿戶口減耗省萬年丞一員尉兩員餘縣各減一員委吏部條件處分拜尚書裴遵慶右僕射以劉晏代之夏四月壬寅復陝州虞邑爲安邑縣虢州太平爲湖城縣五月丙戌京師地震辛卯李涵使吐蕃以僕固懷恩女爲崇徽公主嫁其可汗六月辛亥昇辰州爲都督府析辰巫溪錦棠等州置團練觀察使秋七月己丑子儀鎮邠州朔方軍士久家

河中頗不樂徙逃歸者衆行軍司馬嚴郢誅其渠帥數日方定
己亥廢仙川襄城葉縣汝州己巳魚朝恩有罪自殺貶裴士
淹第五琦處饒二州刺史戊寅復罷度支轉運常平鹽鐵等使
委宰相領之自夏連雨至秋八月京城米貴斗八百錢出官糧
減價糶於貧民詔釋繫囚禁畿內弋獵冬十二月辛酉分京兆
府稅上等每畝一斗下等六升開墾荒田二升

五年春正月壬申張延賞兼御史大夫充東都留守罷河南四
道副元帥所管軍隸焉二月庚子湖南兵馬使臧玠殺觀察使
崔瓘據潭州爲亂詔以羽林大將軍辛京果代之戊戌命澧州
刺史楊子琳道州裴虬衡州楊濟各出軍討玠己未夜晝起五
車長三丈五月己卯夜晝起北方其色白甲申徙置常悉相靜
恭五州於山險要害地以備吐蕃六月己未晝滅赦天下禁囚

秋七月京城斗米千錢丁卯王綰入朝以浙東觀察使薛兼訓
爲太原尹檢校工部尚書八月辛卯元載請置中都於河中府
秋杪行幸春中還京以避蕃戎侵寇之患意欲權歸於已收關
輔河東等十州戶稅入奉京師疏入不報九月丁丑吐蕃寇永
壽冬十二月乙未改巫州爲澁州業州爲蔣州

六年春二月河西隴右山南西道副元帥李抱玉奏所統兵自
河隴達于扶文綿亘二千餘里若吐蕃由兩道俱下首尾不贍
乃詔抱玉專備隴坻嶺南蠻酋梁崇牽作亂據容州經略使王
玢討擒之三月河北旱米斛萬錢夏四月上御宣政殿試制舉
人已未楊子琳來朝賜名猷戊寅詔禁綾錦花文盤龍對鳳異
色花樣雜長行白錦大小花綾任例織造五月成都司錄李少
良疏元載陰事上置之客省載奏與侍御史陸珽評事韋頌漏

洩禁中語皆論殺之夏秋久旱八月己未始雨自此至九月不止民苦害稼上益厭元祐所爲思得朝臣不阿附者丙午自擢浙江觀察使李栖筠爲御史大夫載尚不知因是稍屈冬十一月己亥文單國王婆彌來朝獻馴象制授開府儀同三司武殿中監是歲鄆州置肅戍軍輸棗置靜塞軍滄州置橫海軍改泉州爲兗州

七年春正月戊子於魏置豐州及觀城清豐縣并割臨黃隸涇州以臨清之張橋店置永濟縣甲辰廻紇使出鴻臚寺劫掠坊市吏不能禁復犯金光朱雀等門皇城皆閉慰諭之方止三月壬辰詔諫議大夫四員爲定夏五月辛卯徙忻州七聖容於太原紫極宮六月庚戌朔日食陰雲不見秋七月盧龍將吏李懷瑗殺朱希彩推經略副使朱泚權知留後八月庚戌賜北庭都

護曹令忠姓名李元忠冬十月辛未授朱泚檢校左散騎常侍
充幽州盧龍節度使十一月庚辰詔以蕃戎入寇屢多征役免
巴達渠渠壁充通關八州租庸十二月丙寅雨土是夜長星出
於參辛未滑州置永平軍壬子禁鑄銅器癸酉大雪是歲秋稔
迴紇吐蕃大食渤海室韋靺鞨契丹奚群荊康國石國並遣使
朝貢

八年春正月癸卯勅在京三品已上并郎官御史每年各舉堪
爲刺史縣令者一人夏五月李栖筠彈劾吏部侍郎徐浩典選
不平貶爲明州別駕薛邕歙州刺史京兆尹杜濟杭州刺史秋
八月朱泚遣弟滔將兵防秋上大喜詔千騎送於國門甲午東
都留守蔣瓊兼知貢舉太府卿于頔爲京兆尹九月壬午循州
刺史哥舒晃反殺嶺南節度使呂崇貢以江西觀察路嗣恭代

之有大鳥見武功肉翅狐首四足有爪毛赤如蝙蝠羣鳥隨而噪之神策將張白芬射斃以獻冬無雪十月庚申吐蕃寇涇與邠州朔方兵馬使渾瑊與涇原馬璘極力追躡蕃軍潰去戊辰郭子儀奏破吐蕃十萬百寮稱賀十一月元載請城原州以備吐蕃是歲大有年汴宋田神功淮西李忠臣皆來朝

九年春二月癸丑郭子儀李抱玉皆來朝三月上以田承嗣驕慢欲結其心以永樂公主妻其子華夏四月甲申中書舍人常袞率兩省官十八人詣閣請論事詔引進各盡所懷乙酉子儀率諸將大閱乙未華陽公主薨上悲惜累日不聽朝宰臣抗疏陳情五月庚申詔以歲豐穀賤令度支轉運率諸色雜錢送納上都以備和糴丙寅涇原馬璘來朝諷將士進狀求爲左僕射知省事從之朱泚表請入朝自率五千騎防秋詔所司築第以

待六月番僧不空死贈司空賜爵肅國公諡曰廣智癸亥判度
支韓滉奏安邑池生乳鹽是夏詔城奉天以備蕃寇於隴州華
亭縣置義寧軍秋七月久旱京兆尹黎幹歷禱諸祠未雨請禱
文宣廟上笑之八月甲寅劉晏知三銓選事己未吐蕃寇靈武
庚午方退九月癸未晉州男子郇談進三十字一字言一事上
召見賜衣館之禁中罪左巡殿中侍御史楊護抑而不聞命貶
之戍子加朱泚檢校戶部尚書封懷寧郡王冬十二月壬辰赦
十年春正月己酉川承嗣誘陷義兵馬使裴志清逐留後薛萼
詔遣中使孫知在宣諭各守封疆命李承昭權知留後癸丑承
嗣拒不奉詔襲洛與衛州盡盜所管地自署官吏丙寅罷辰錦
溪獎五州經略使復隸黔中辛未以藩鎮漸強議封皇子兼領
天下諸州述睦王領嶺南節度度支營田經略觀察處置等大

使逾邾王領渭北邾坊等州連恩王廸韓王領汴宋等州連邾
王造忻王領昭義等軍皆節度大使廸韶王運嘉王遇端王遙
循王通恭王達原王逸雅王並開府儀同三司丙子河陽軍亂
逐三城使常休明迫牙將王惟恭爲留後三月甲午陝州軍亂
逐李國清縱兵大掠一夕方定己巳薛崇常休明至闕待罪夏
四月乙未削田承嗣官爵命河東等九道出師討之甲申大雨
雹暴風拔樹人多震死損京畿七縣稼五月劔南置昌州癸卯
罷兩都貢舉停童子科六月遣御史大夫李涵督諸節度併力
秋七月己未大風浙杭潮溢溺民家五千船無算八月乙丑李
承昭破魏將盧子期於清水縣生擒以獻九月戊申廸紇殺人
於市吏捕繫萬年獄首領赤心劫出之癸丑吐蕃寇隴涇李抱
玉馬璘連擊退之戊午朱泚留征吐蕃加同平章事移鎮奉天

冬十月辛酉日蝕癸亥以馬燧充河陽三城節度使丙寅貲妃
獨孤氏薨帝寵愛迫贈貞懿皇后十一月丁酉承嗣僞瀛州刺
史吳希光以城降丁未路嗣恭攻破廣州擒哥舒晃斬首以獻
十一年春正月庚寅朔詔赦田承嗣壬辰遣諫議大夫杜亞宣
慰許令入朝辛亥劔南崔寧大破吐蕃斬首萬級生擒首領來
獻二月癸亥荆南衛伯玉入朝卒于京師以張延賞代之戊子
河陽軍復亂監軍使冉廷蘭斬其亂首方定夏四月己卯汴將
李靈耀殺兵馬使孟鑒北連承嗣五月癸巳轉李勉汴宋節度
使授靈耀濮州刺史拒不受六月戊戌復以充汴宋留後秋八
月丙寅靈耀據汴州叛甲申命淮西李忠臣承平李勉河陽馬
燧三鎮兵討之閏月丁酉太白經天九月乙丑忠臣等進營鄭
州靈耀率衆搏戰淮西兵亂退屯滎澤冬十月乙酉忠臣等破

靈耀於中牟又敗之於西梁固遂入城固守乙丑承嗣遣田悅率兵三萬赴援丙午淮西河陽合擊大敗之悅脫身北走靈耀聞之棄城而遁丁未滑將杜如江生擒以獻汴州平加李忠臣檢校司空同平章事兼汴州刺史以鎮之十二月丁亥論取鄆濮二州功正己寶臣皆加檢校司空同平章事庚寅馬璘卒以段秀實權知留後李承昭稱疾以李抱玉權知留後

十二年春正月辛酉授秀實涇州刺史兼充都團練使壬辰渤海獻日本國舞女十一人二月戊子李正己徙治鄆州以子納守青州刺史充淄青節度留後丁未轉李國清黔州刺史三月乙卯李抱玉卒癸亥陞少尹鮑防爲太原尹庚辰復田承嗣并諸子等官爵賜以鐵券庚辰元載王縉有罪下獄辛巳賜載自盡貶縉括州刺史夏四月壬午以楊綰爲中書侍郎常袞門下

侍郎並同平章事癸巳除載所忌故相李揆爲睦州刺史綰等
薦顏真卿以爲刑部尚書丁酉崔寧奏破吐蕃於黎雅州擒大
龍官論器然以獻壬寅渤海奚契丹室韋韃靼並遣使朝貢已
酉加在京文武官料錢一歲十五萬六千貫并舊給凡二十六
萬貫五月辛亥關內副元帥渾瑊兼并州刺史罷諸州團練守
捉使名甲寅改諸道郵務在上都者名曰進奏院六月癸巳旱
齋居祈禱聖體遑康遂不視朝秋七月戊午罷潤州丹陽并蘇
常州軍八月癸巳加東川節度使鮮于叔明檢校工部尚書賜
以國姓癸卯常袞等辭堂餞九月辛酉段秀實兼四鎮北廷行
營涇原鄭棣等州節度使庚午吐蕃寇坊州掠党項羊馬而去
京兆黎幹奏朱毫陳滑諸州大水損田與度支韓滉所奏不類
差御史趙計言寶渭南令劉藻附滉奏云無損上欺惑縣令職

在字人乃不仁若是命典計皆貶官冬十月丁亥泥又奏解縣
兩池生瑞鹽命置神祠境上號寶應靈慶池乙巳以滑州牙將
劉洽爲宋州刺史十一月癸酉顏真卿獻所著韻海鏡源十二
月丁亥崔寧又破吐蕃十萬於西山斬首八千生擒九百人加
檢校司空庚子朱泚兼隴右節度副大使權知河西澤路行營
兵馬事

十三年春正月辛酉京兆請修六門堰壞碾磴八十餘所以漚
澆田戊辰迴紇寇太原鮑防與戰不利二月庚辰代州都督張
光晟破之于羊武谷北人始安三月甲戌河陽將士劫迴紇輜
重因與相圖縱兵大掠久之方定夏四月甲辰吐蕃寇靈州朔
方留後常謙光擊敗之五月戊午賜宦官劉清潭名忠翼六月
戊戌朱泚獻猶鼠同乳秋七月壬子中書舍人崔祐甫知吏部

選事辛未吐蕃寇鹽慶二州子儀遣懷光擊破之冬十月丁酉
始葬貞懿皇后於莊陵十一月丁卯日長至上不視朝命有司
代祀南郊是歲郴州黃山崩壓死數百人

十四年春正月壬戌李泌召見以爲澧州刺史二月癸未田承
嗣卒李寶臣請以悅爲留後從之三月丁未淮西都虞候李希
烈逐從父忠臣自立夏五月癸卯上不康至辛亥不視朝辛酉
詔皇太子監國是夕帝崩于紫宸殿在位一十七年壽五十二
遣詔皇太子柩前卽位壬戌遷神柩于太極殿發喪諡曰睿文
孝武皇帝廟號代宗

而曰憂患而生安樂以死死非一已延及孫子內叛外侵
東傾西北執熱思涼死而後已

弘簡錄卷之五

終

弘簡錄卷之六

皇清翰

學士四世孫遠平校閱

天王 唐一之九

德宗皇帝諱适代宗長子母廢真沈皇后以天寶元年四月癸巳生於東宮授特進封奉節郡王代宗卽位首拜天下兵馬元帥進封魯王再進雍王以破史朝義進收東都加尚書令食實封二千戶河南北悉平立爲皇太子見京尹黎幹以上多感禁忌使禁王驂珠刺繡製爲御服焚以禳禱大不謂然代宗崩次日癸亥卽位於太極殿居諒陰動遵禮法罷內道場除巫祝送大行喪輜車行不中道問故有司奏陛下本命在午故避之泣曰安有枉靈駕以謀身利命直午而行又宣政廊壞太卜言孟

冬魁星不可營繕輒曰春秋啓塞從時何魁星爲亟詔葺之閏
月壬午擢侍讀張涉爲翰林學士貶常袞湖州刺史召崔祐甫
爲門下侍郎同平章事丙子詔罷邕州歲貢婢奴并新羅渤海
鷹鷄見在五坊者放之其山南枇杷江南柑橘劔南春酒歲一
貢以供宗廟餘悉停之癸未收括爲處州括蒼爲麗水縣停梨
園使及伶官冗食者三百畱者皆隸太常甲申加號千儀尚父
冊拜太尉其禮久廢至是始行丙戌禁天下毋奏祥瑞銀器勿
以金飾丁亥放舞象出宮女百餘減常貢錦千匹及服玩數千
事丙申殺黎幹劉忠翼丁酉詔自今財賦並歸左藏罷韓況以
劉晏判度支鹽鐵轉運悉領所掌財賦六月己亥朔大赦加諸
鎮官階凡進獻郊社陵廟依前勿闕餘並停止諸州刺史上佐
令准後式入計自至德己未別勅或因人奏或臨事頒行中書

門下與詳定官決取堪久長行用者編入格條自今不得奏置
寺觀及度僧道有冤滯聽詣三司及登聞鼓院庚子封皇子誦
宣王謨舒王誡通王諒度王詳肅王並加開府儀同三司皇弟
廼益王迅隨王丙午舉先天故事文武六品已上每日二人更
直以備顧問癸丑詔皇族五服已上居四方者家一人赴山陵
縣次給食己未罷揚州每年端午貢江心所鑄鏡及幽州麝香
辛酉罷宣歙池鄂岳河都團練觀察使陝虢都防禦使以其地
分隸諸道復置東都京畿觀察使壬戌中官邵光超送淮西李
希烈旌節受賂事發杖六十配流李正己畏上威名表獻錢三
十萬繼命以勞淄青將士天下咸謂太平之治庶幾可望焉癸
亥詔諸司長官各舉可任刺史縣令者一人中書門下量才進
擬有犯併坐舉主秋七月戊辰朔日食庚午詔邕州所奏金坑

語人以利非朕素懷自今任人開採官不許禁罷揚州廻易邸
王公以下毋得與民爭利辛未罷永泰已來右銀臺門客省給
四方奏計上書言事及蕃客未報者食壬申毀元載馬璘劉忠
翼第丁丑復置廐馬隨仗於月華門外庚辰詔鴻臚寺蕃客入
京各服本國之服辛卯罷天下榷酒丁酉詔國用未給權停宣
王已下開府俸料八月甲辰轉祐甫中書侍郎名道州司馬楊
炎爲門下侍郎懷州刺史喬琳爲御史大夫並同平章事乙巳
遣太常少卿韋倫使吐蕃歸俘五百修好庚申上代宗諡九月
甲戌改淮西爲淮寧軍冬十月丁酉朔吐蕃合南蠻衆三道入
寇連陷扶黎郡邑遣神策都將李晟等擊破之己酉葬元陵十
一月壬午喬琳罷十二月丁酉祔主太廟乙卯立宣王誦爲皇
太子丙寅晦日蝕

建中元年春正月丁卯朔改元羣臣上尊號曰聖神文武皇帝
己巳朔饗太清宮庚午謁太廟辛未南郊大赦用楊炎議革罷
近來一切徵賦名目命黜陟使與觀察刺史約百姓丁產等級
作兩稅法此外輒率一錢以枉法論凡授諸道節度觀察防禦
都知兵馬及刺史少尹畿赤令大理司直評事等授訖限三日
內於四方館表議一人以自代其外官委長吏附送其表付中
書門下每官闕視衆多者授之王府及諸有司可併省與諸官
可減者量事廢省餘依故凡兵興已來方鎮重任兼臺省長官
外府僚佐帶臺省銜者並除之甲午詔劉晏頃者兵革未息權
立東都河南江淮山南東等轉運租庸青苗鹽鐵等使今並停
止天下錢穀委金倉二部中書門下揀兩司郎官唯格式調掌
炎又建議發兩京關內丁夫浚豐州陵陽梁及城原州京尹嚴

鄧奏按朔方五城舊屯肥饒喪亂以來人功不及遂致荒廢若
力可墾闢不俟浚渠今虛穢旬發人浚渠得不補費御史張著
劾鄧坐削官二月丙申遣繼陟使拱經綸等十一人分行天下
罷魏博軍夫四萬令還農士卒皆怨癸卯罷段秀實爲司農卿
以朱泚兼四鎮北庭涇原節度使已酉貶劉晏忠州刺史三月
甲戌前司農卿庾準爲江陵尹誣劉晏怨望賜死癸巳以韓洄
爲戶部侍郎判度支金部郎中杜佑權勾當江淮水陸運使時
楊炎排晏已罷使名歸尚書省所命復如常制議者非之夏四
月乙未朔城原州詔下衆心不安涇原裨將劉文喜據城叛已
亥地震癸丑上誕日不受貢獻唯李正己田悅各獻縑三萬匹
詔付度支妃父王景先駙馬高怡獻金銅像退還之壬戌嗣曹
王臯爲潭州刺史說降湖南賊帥王國良使還農五月吐蕃遣

使朝貢再遣韋倫報之六月辛丑從衛士桑道茂言築奉天城
涇州將劉海賓殺文喜以降封爲樂平郡王原州竟不果城乙
卯京兆尹源休使廻紇問武義成功可汗秋七月丁丑罷蓋
益八月甲午振武軍使張光晟殺廻紇首領突董等千人收
馬繪錦詣微光晟歸朝以彭令芳代之丁未加朱泚中書令
遷授舒王謨涇原節度大使右丞孟皞知留後事東襲烏蠻
守來朝貢丁巳遙尊上母沈氏爲皇太后九月戊辰韓洄奏
罷江淮七監鑄錢浪費無實請於商州紅崖冶洛源監置十
爐更鑄從之己卯雷時上親任朝士斥遠宦豎以儒學進張
涉以文雅登薛邕皆以賊敗上心始疑放涉歸田貶邕連山尉
兵興已來州府不上計內外不朝會者二十有五年始復舊制
冬十一月辛酉朔見朝集使并貢使於宣政殿每日分番二人
待詔訪民疾

苦乙丑贈敬暉等及張九齡鍾紹京官戊寅令諸王出闕就班
諸院縣主久失婚時悉命出降始定公主見舅姑禮十二月辛
卯韋倫與吐蕃論欽明思等五十五人同至修好并獻方物丁
酉詳定將相功臣房玄齡等一百八十七人分爲三等是歲戶
部計帳戶總三百八萬五千七十有六賦入一千三百五萬六
千七十貫鹽利不在此限

二年春正月戊辰李寶臣卒田悅請以其子惟岳繼襲上欲革
前弊不許惟岳自稱留後悅與正已同謀勒兵拒命丙子詔分
汴宋滑爲三節度命劉洽領宋毫潁三州路嗣恭領懷鄭汝陝
四州劉鄩州隸永平以備之二月乙巳轉楊炎中書侍郎盧杞
爲門下侍郎同平章事丙午改宋毫爲宣武軍加劉洽御史大
夫乙卯振武軍亂殺其帥彭令芳并監軍劉惠光以汾州刺史

王栩知留後事以討之三月庚申朔築汴州城正己田悅移兵
爲備辛巳遣崔漢衡使吐蕃夏四月庚寅加梁崇義同平章事
遣張著徵入朝崇義不受命與三鎮連兵加李希烈爵南平郡
王充漢南北諸道都知兵馬招撫處置使以討之時運路皆絕
人心震恐江淮進奉船咸泊渦口不敢進上命張萬福爲濠州
刺史馳至發之五月丙寅以軍興增商稅爲十一悅舉兵圍邢
洺州邢州刺史李共臨洺將張伍堅壁拒守六月癸亥太白闕
于東井庚寅建浙江西道爲鎮海軍拜韓滉節度使時上封者
衆置理匭使中丞一員知匭使諫議一員給事中中書舍人監
考之辛丑郭子儀薨副使李芑爲河陽三城懷鄭四州節度使
自河隴陷蕃官皆遙領聲問不通者十餘年秋七月戊子朔安
西北庭遣使由廻紇間道詣闕詔賜節度使李元忠爵寧塞郡

王四鎮留後郭昕武威郡王賻袁光庭工部尚書將士超七資
授官庾申盧杞密言希烈兵不出爲楊炎上乃罷炎拜張鎰中
書侍郎同平章事田悅攻臨洛累月城中食盡李抱真告急詔
遣馬燧李晟救之大破悅衆二州圍解八月辛卯李正己卒納
自領軍務與惟岳將兵救悅上命馬燧帥諸軍進屯鄴令李芄
將兵會之從兄李洧以徐州來降壬子李希烈誅梁崇義傳首
京師襄陽平加希烈同平章事轉河中尹李承山南節度觀察
使以守之九月辛酉朱滔遣判官蔡雄說降惟岳將李孝忠以
爲恆州刺史充成德軍節度觀察使冬十月裕于太廟乙酉上
納盧杞譖炎有異志貶爲崖州司馬尋賜死戊申洧告納將王
溫共魏博兵攻徐州詔遣唐朝臣劉洽曲環李澄四將救之十
一月辛未大破其衆漕運始通己巳詔削惟岳官爵

三年春正月馬燧與諸軍直趨魏州大破田悅兵已而遣符璘將三百騎復赴李納璘降于馬燧是月悅將李再春與田昂以博洛二州來降丙寅朱滔及孝忠破惟岳之兵於東鹿康日知楊政義復納趙定二州辛未詔減供御及太子諸王常膳宰臣堂厨并百官俸各三分之一以助軍庚辰追封皇叔僖宋王皇弟選荆王閏月甲辰王武俊殺李惟岳傳首京師二月戊午加朱滔檢校司徒張孝忠兵部尚書康日知趙州刺史王武俊祕書監李洎徐沂海觀察夏四月詔武俊以糧三千石給朱滔馬五百匹給馬燧武俊不受詔與朱滔各懷怨望上以力未能制封滔通義郡王冀以安之滔與武俊反謀益甚使人說孝忠獨不從甲子博士韋都賓陳京建議三叛合從庸調不給請括借富商錢詔京兆長安萬年大索刑法嚴峻人不勝苦至自縊

京師囂然計所得纔八十萬貫少尹韋禎又拷索僦櫃質庫纔及二百萬人已空竭戊寅召朱泚入朝加太尉賜實封五百戶并園田錦綵金銀器皿以安其意出宰相張鎰代之盧杞忌嚴郢勸上嚴刻壬午以事貶郢併杖殺殿中侍御史鄭詹又貶詹事郢說歸州刺史與郢咸卒貶所五月丙戌增兩稅并權鹽錢每貫增二百斛增一百辛卯詔李懷光率神策諸軍東討丙申以吐蕃通和贈至德以來故節度使伊西北庭楊休明司徒河西周鼎太保故刺史西州李琇璋戶部尚書瓜州張銑兵部侍郎咸令歸葬及還僧尼將士八百餘人丁酉賞破田悅功加馬燧同平章事李抱真檢校右僕射李芑兵部尚書李晟右散騎常侍辛亥賜易定滄州名義武軍六月甲子京師地震辛未朱滔武俊合兵救田悅至魏州懷光與戰於連籛山王師不利賊

壅河決水絕我糧道秋七月庚子燧等四節度及三叛兵皆屯於渭橋隔河對壘自五月不雨甲辰始雨加李勉檢校司徒李希烈檢校司空李懷光同平章事封李光開陽郡王八月丁未判度支趙贊請置汴東西水陸轉運等官分包估汴東陸運崔縱汴西水運皆兼兩稅鹽鐵使九月丁亥趙贊又請於兩都江陵成都揚汴蘓洪等州置常平本收貯米斛段匹絲麻貴賤賤收權其輕重以利民始命於諸道要津置吏稅商貨并竹木茶漆皆什分取一以充常平之本冬十月丙辰關播爲中書侍郎同平章事政事一決于杞使吐蕃都官員外郎樊澤還與蕃相尚結贊約來年正月望日會盟十一月甲午朱滔僭稱冀王王武俊趙王悅魏王納齊王各置官名十二月丁丑李希烈稱建興王天下都元帥四盜膠固推滔爲盟主

四年春正月丁亥張鎰與尚結贊同盟於清水庚寅希烈陷汝州攻圍尉氏鄭州東都震駭甲午遣顏真卿往宣慰戊戌詔汝州節度使哥舒曜率鳳翔邠寧涇原等軍東討二月乙卯曜收汝州三月辛卯曹王臯敗希烈兵斬其將陳質復斬黃二州希烈引歸鄭始解圍丁酉荆南張伯儀敗於安州夏四月庚申加李勉淮西招討處置等使賈耽與臯副之甲子京師地震生毛五月辛巳夜地連震乙巳滑州馬生角及濮州黃河清趙贊奏四鎮兵屯月費錢一百三十萬貫巧法不能給六月庚戌朔始行稅間架及除陌錢法所在愁嘆之聲徧於天下秋七月甲申以李揆充入吐蕃會盟使八月丁未希烈率衆圍襄城李勉奏許州空虛請以輕兵襲之襄圍自解九月丙戌遣唐漢臣劉德信襲許未至責還遇伏敗於滬澗自此氣沮襄城益危冬十月

丙午詔涇原節度使姚令言率師以救襄城上先問學士陸贄
關中形勢勸以追還神策六軍恐有一時竊發驚犯城闕猝無
以應上不能用丁未涇軍過京城作亂謀取瓊林大盈二庫財
物上遣晉王與學士姜公輔載繒綵往諭亂兵已入陣于丹鳳
闕下促白志貞所募兵拒之無有至者上與太子諸王妃主百
餘人出苑北門右龍武軍使令狐建聞難聚射士四百尾從至
夕抵咸陽因思桑道茂之言戊申幸奉天已酉渾瑊至行在以
爲都虞候白志真都知兵馬使令狐建中軍鼓角使金吾將軍
侯仲莊奉天防城使亂兵剽掠京城迎朱泚爲帥自稱太尉居
含元殿段秀實等謀誅之不克鳳翔副將李楚琳殺張鎰以應
泚越二日泚入宣政殿僭號大秦皇帝年稱應天署侍中以下
僞官誅宗室七十七人癸丑希烈陷襄城丁巳以吏部尚書蕭

復刑部侍郎劉從一諫議大夫姜公輔並同中書門下平章事
馮河清姚况兵赴行在拜河清涇原節度使况爲司馬泚兵犯
奉天邠寧韓遊瓌拒戰不利乘勝攻門渾瑊力戰捍禦大將呂
希倩死之將軍高重傑戰于梁山亦死是日商州軍亂殺刺史
謝良輔以都虞候王仙鶴權防禦使十一月乙亥以隴右留後
韋臯兼奉義軍節度使賊敗靈武杜希全鹽州戴休顏夏州時
常春援兵六千攻城逾急上與渾瑊對泣城中憂恐泚據乾陵
僭觀奏樂嫚詞以逞戊子造雲橋將攻東北隅人心危蹙阻塹
不得進瑊悉焚之朔方李懷光遣兵馬使張韶表言大軍將至
巡城叫呼歡聲動地癸巳懷光至醴泉敗泚兵奉天開解李晟
自定州晝夜兼行軍於渭橋以爲行營節度使盧杞因懷光數
言其姦恐來見必誅誅之勸上無聽入朝令引兵還取長安懷

光上表暴犯罪惡十二月壬戌貶杞志真贊新恩播三州司馬
癸亥以京兆少尹裴腆判度支乙丑陸贄爲考功郎中兼翰林
學士庚午希烈陷汴州李勉奔宋淮南陳少遊降賊江淮大震
癸酉關播罷命孔巢父董晉宣慰滑青河北

興元元年春正月癸酉朔上在奉天受朝於行宮大赦改元詔
書罪已痛自剋責黜聖神文武之號洗滌李希烈田悅王武俊
李納朱滔等罪惟不赦朱泚罷收除陌間架等錢竹木茶漆等
稅下日天下人心大悅武俊悅納皆去王號上表謝罪昇奉天
爲赤縣分命朝臣諸道宣諭丙戌拜蕭復門下侍郎盧翰兵部
侍郎同平章事戊子又忌蕭復言多輕脫改充江淮等道宣慰
安撫使丙申擢渾瑊行在都知兵馬使庚子知奉誠軍節度使
二月戊寅加段秀實贈諡并實封仍樹碑立廟又贈賈隱林復

田悅等官爵加悅左僕射武俊平章事恆翼深趙節度使納平
盧節度使吐蕃遣使來朝請助兵討逆命宣諭時懷光自以迫
脇朝廷內不能安遂萌異志密與此通謀詔許與晟合軍晟奏
懷光反狀已露請上幸蜀甲子詔加懷光太尉賜鐵券丙寅奪
楊惠元李建徽兵惠元被害贈左僕射丁卯駕幸梁州詔戴休
顏守奉天尚可孤守潞上駱元光守渭橋除李晟河內同絳節
度使同平章事三月壬辰抵梁復欲幸蜀會晟表言收復有期
而止己亥加渾瑊平章事充朔方邠寧振武永平奉天行營副
元帥庚子涇軍亂副將田希鑒殺主帥馮河清自稱留後附于
朱泚夏四月辛丑朔左右請上御暑服以將士未易冬衣却不
受會江淮判官王紹實緡帛至命先給諸軍而始御之鎮海軍
韓滉運米至關中價正踊貴減五之四壬寅賜奉天隨從將士

號定難功臣以劉洽爲汴滑宋毫都統韓遊瓌邠寧節度使甲辰加晟諸道副元帥甲寅上長女唐安公主薨欲爲造塔厚葬姜公輔諫罷爲左庶子乙丑渾瑊與吐蕃論莽羅破賊將韓旻於武功斬首萬級泚使田希鑒賂吐蕃金帛令引歸國五月丙子李抱真會王武俊破朱滔於京城東南斬首三萬級擒僞相朱良祐李俊以獻滔遁歸幽州加抱真檢校司空武俊司徒並賜實封五百戶庚寅李納上章稟命加平章事壬辰商州尚可孤破賊於藍田乙未李晟大陳兵自滑北移光泰門奮擊賊帥斬馘數千賊敗走入白華門戊戌將步騎兵由神農村直抵苑牆破其柵路元光等繼至進擊大勝泚與令言西走是日瑊與戴休顏韓遊瓌亦克咸陽分兵追至涇州韓旻斬泚希鑒殺令言各傳其首赴于行在六月庚子朔晟收復京師露布以聞上

覽之涕下乙巳遣吏部侍郎班宏入京宣諭已酉加晟司徒兼中書令封合川郡王賜實封一千戶瑊爲侍中樓煩郡王實封八百戶璐元光右僕射尚可孤馮翊郡王各實封五百戶韓遊瓌左僕射實封四百戶戴休顏右僕射實封二百戶田希鑒涇原節度使李楚琳韋臯左右金吾大將軍癸丑昇梁州爲興元府尹嚴震檢校右僕射賜實封一百戶鄭縣爲赤縣令賜緋百姓給復二年見任官加兩階耆老與版授轉陸贄司封郎中與吉中孚並知制誥進諫議大夫水部員外郎顧少連禮部郎中並依前翰林學士上初從李泌遊以方刺杭州急詔徵之至拜左散騎常侍令狐建時常春右散騎常侍丙辰斬僞相李忠臣籍沒其家悉以財物牛馬奴婢賞勞軍士戊午車駕還京秋七月丙子次鳳翔僞署官喬琳蔣鎮張光晟李通蔣鑑洪經綸崔

宣等皆伏誅放管內今年秋稅耆壽侍老依例受官府縣置頓
官考滿日放選諸郡王并子孫爲賊所害者令所司具禮收殮
壬午入京城與遊瑛休顏等扈從晨與元可孤等奉迎步騎
十餘萬旌旗數十里都民僧道歡呼感泣辛卯大赦賜晨永崇
里新第及女樂八人命宰臣以下送入教坊鼓吹導從京兆供
食饌衆庶大爲榮觀時涇州屢害軍帥且近吐蕃晨奏請往治
八月癸卯命兼鳳翔尹奏楚琳希鑒之罪上命赦楚琳而殺希
鑒邊郡肅然甲辰討李懷光以馬燧爲奉誠軍節度行營兵馬
渾瑊爲河中尹同陝虢靈等州行營兵馬皆副元帥賜瑊大寧
里第并女樂饋贈一如晟故事乙巳授杜希全靈州大都督西
受降城天德軍靈夏等州節度使唐朝臣鄜坊丹延等州節
度使是秋蝗詔賜宋毫淄青澤潞河東恆冀幽易鎮定魏博等

八節度各米五萬石河陽東畿各三萬石以賑饑民冬十月乙
丑馬燧將步騎三萬收復絳州唐朝臣收永樂縣戊辰復令中
官竇文瑒王希遷監左右神策軍都知兵馬使閏月庚午暴希
烈罪惡明論諸道與淮西接連者非被侵軼不須進討希烈若
降待以不死自餘將士百姓一無所問戊子希烈將李澄以滑
州降命爲汴滑節度使封武威郡王十一月癸卯劉洽與隴右
曲環大破希烈之衆於陳州俘斬三萬級生擒賊將翟崇暉以
獻遂乘勝進攻汴州戊午擒僞相鄭賁等五人希烈遁歸蔡汴
州平李勉至長安素服待罪上用李泌言命復其位又疑韓滉
陰蓄異志泌請以百口保亦從之令其子臯歸覲諭以謗言滉
感泣卽日運米百萬斛陳少遊聞之亦貢米二十萬斛上謂能
化少遊加滉同平章事少遊聞之慚懼而死十二月辛卯陸贄

爲中書舍人學士如故

貞元元年春正月丁酉朔御含元殿受朝大赦改元戊戌大風
雪民饑斗米千錢凍死者踣於路癸丑始聞顏真卿被害廢朝
五日加諡贈特授男顏頊等官壬戌上思盧杞欲用爲饒州刺
史朝議不可而止二月丙寅朔遣工部尚書賈耽侍郎劉太真
分往宣慰東都兩河饑民寒食節日上與諸將擊鞠於內殿三
月馬燧及懷光戰于陶城敗之斬首萬級分兵會渾瑊逼河中
丙申韓洄爲兵部侍郎汴東轉運使元琇兼諸道水陸轉運使
丁未希烈陷南陽殺守將黃金徽戊午加劉洽檢校司空賜名
玄佐夏四月丁丑曹王臯爲江陵尹火燒錢穀百餘萬賦調不
入國用益窘壬午河中軍進圍長春宮朝議以資匱請赦之李
晟言五不可命諸將圍守五月癸卯關中旱漸水將絕分命朝

臣禱雨蝗食草木及畜毛俱盡民蒸而食有司計度支經費可支七旬六月辛巳賜滑州永平軍名曰義成時朱滔病死將士奉前涿州刺史劉怱知軍事秋七月甲午朔馬燧自行營來朝許假一月糧平李懷光辛丑陝虢兵馬使達奚抱暉鵠殺節度使張勸代總軍務邀旌節上遣李泌爲都防禦觀察陸運使令賞版幣單騎入祭抱暉亡去不知所之八月甲戌懷光自縊麾下牛名俊斬其首傳送闕下河中平馬燧入城斬閹晏等七人餘皆不問丁丑始雨已卯詔還懷光屍首任其收葬妻及男女送豐州逐便安置給復河中絳百姓一年加燧侍中臧檢校司空子授五品正官加元光遊瓊朝臣各實封二百戶子授六品正官罷淮西兵賜行營將士宴賞段帛二十萬端匹李晟上表阻張延賞入相上改爲左僕射九月乙巳上御正殿策賢良方

正能直言極諫等三科舉人十一月癸卯南郊大赦丁丑歲凶
賜文武常叅官錢七百萬貫十二月戊辰詔延英視事日引常
叅官七人入對陳時政得失戶部奏今歲入貢凡百五十州

二年春正月壬辰以歲饑罷元會禮丙申詔減御膳及官人月
糧飛龍馬料出臺中御史爲饑赤令壬寅盧瀚罷以散騎常侍
劉滋給事中權造中書舍人齊映並守本官同平章事二月癸
亥山南樊澤奏破希烈衆五千擒其將杜文朝以獻三月李泌
開運道成自集津至三門鑿山路十八里以避底柱之險壬寅
李澄奏破希烈衆於鄭州夏四月丙寅淮西將陳仙奇醢殺李
希烈并屠其家舉衆來降淮蔡平甲申賞功授仙奇淮西節度
使劉玄佐李澄曲環李阜賈耽張建封各與一子正官五月癸
巳大雨至於丙申關中米價騰貴倉廩空竭禁軍至脫巾求糧

于道上憂甚會李泌奏韓滉運米三萬斛至陝上聞之喜遽至東宮沽酒爲樂神策六軍皆呼萬歲時禁中亦停釀市或有醉人以爲嘉端已酉地震秋七月辛卯淮西兵馬使吳少誠爲希烈報讐殺陳仙奇上命虔王諒領中光隨蔡節度大使少誠知留後事賈耽爲東都畿唐汝鄧都防禦觀察使曲環爲陳許節度使數年流亡復業兵食皆足丙戌吐蕃寇涇隴邠寧諸鎮閉壁自固京師戒嚴詔渾瑊駱元光屯咸陽以備之初上與李泌議復府兵歷敘興廢之由謂天寶禍亂如此未有外叛內侮殺帥自擅者誠以顧戀田園恐累宗族故也向使其法常存不廢安有今日下陵上替之患上曰俟平河中當與卿議之九月丁亥詔置十六衛上將軍以寵勳臣改神策左右廂爲軍殿前左右廂亦爲射生左右軍各置大將軍二人將軍二人丁酉李澄

卒其子士寧謀襲位朝命賈耽領之乙巳吐蕃寇好畤晟遣部將王泌引驍勇伏於汧城擊敗之尚結贊僅而獲免冬十月癸亥又破之摧沙堡遂自寧慶引去十一月甲午立淑妃王氏爲皇后丁酉受冊日崩辛丑吐蕃陷鹽州據其城壬寅劉玄佐曲環及鄂嶽盧玄卿並來朝十二月吐蕃又陷夏銀麟州韓遊瓌請發兵攻之丙寅詔駱元光馬燧及陳許兵馬使韓全義將步騎萬二千會邠寧軍趨鹽州燧至石州河曲六吾州皆降遷于雲朔之間辛未李晟來朝謀擊吐蕃上令與張延賞解和壬申始命推酒

三年春正月壬寅延賞柳渾並同平章事渾有疾不視事延賞及馬燧欲與吐蕃和親會上恨迴紇欲結吐蕃共擊之得二人言計乃定壬子吳少誠誘京西戍兵自鄜州叛歸過陝李泌邀

擊之執其將張崇獻等六十餘人送京師腰斬以徇西川節度使韋臯奏閻羅鳳孫雲南王異牟尋請內附二月戊寅延賞言晟不宜久任典兵罷爲太尉兼中書令以都虞候邢君牙爲鳳翔尹兼團練使三月辛亥馬燧引論頗熱觀上言可保信上復許盟夏五月丁亥命渾瑊爲吐蕃會盟使崔漢衡副之尚結贊請改盟所於原州之土梨樹神策將馬有璘奏地多險阨恐蕃軍隱伏不如平涼川其地坦平又近涇州乃改盟於平涼閏月太白晝見凡四十餘日壬戌日有黑暈自辰及申方散辛未會于盟所蕃兵來劫瑊狼狽遁免漢衡及將吏沒者六十餘人上聞驚憾戊寅枉矢墜虛危間馬燧自盟所素服待罪于朝詔釋之罷所管兵用其將左龍武將軍李自良爲太原尹河東節度使又議割振武之綏銀二州以左羽林大將軍韓潭爲節度使

帥神策朔方河東之士以鎮鹽夏城六月丙戌李泌入相秋七月壬申賜谥元光姓名李元諒八月辛巳朔日食丁亥漢衛等還九月丁巳吐蕃掠汧陽吳山華亭界徙民庶於安化峽西癸亥廻紇可汗遣使請昏許降以咸安公主甲戌吐蕃退修原州城屯據之邠涇隴等州民戶被掠殆盡是秋大稔詔和糴粟麥冬十月丙戌神策將魏循告射生將韓欽緒等與妖僧李廣弘同謀不軌詔捕劾坐死者百餘人獨赦欽緒十一月遊瓌入朝盛陳築豐義城可制吐蕃上悅遣還鎮丁丑夜京師地震者三鳥巢散落十二月上畋于新店命復趙光奇家

四年春正月京師地震二旬不止至庚戌朔旦含元殿前階基欄檻損壞三十餘間壓死衛士十餘人大赦天下自今兩稅三年一定壬戌拜左龍武大將軍王栖曜鄜坊丹延劉昌四鎮北

庭涇原等州李元諒隴右臨洮軍皆節度使築良原城以居悉
力營田數年軍食饒足涇隴獲安乙亥地震金房尤甚江溢山
裂廬舍多壞居人露處陳留雨木如大指長寸餘中有孔通下
植於地凡十里許時上敕有宜索勅諸道勿令宰相知二月辛
巳泌以元友直運至淮南錢帛二十萬悉置大盈庫壬午地又
震至丙申不止甲辰太僕郊牛生犢六足豕兩首四足三月戊
辰鹿入京師市門咸陽人奏見白起語以爲國扞禦西陲詔乃
贈起兵部尚書仍令葺杜野舊祠以祀之庚午辛未連震詔劉
昌收平涼會盟所被害將士骸骨葬於淺水原夏四月改左右
射生爲左右神威軍戊戌福建兵亂逐觀察使吳詵遣中使肆
赦以安衆心命吳湊領其任貶詵涪州刺史五月昇鄆州爲大
都督府華人陷蕃者導吐蕃寇涇寧慶鄜等州焚彭原縣諸鎮

以盛夏非時無敢與戰恣其大掠凡二旬而退壬戌置諫議大夫八員分中書四員爲右門下四員爲左丙寅丁卯地連震乙亥熒惑填聚于營室凡二十日六月乙亥封皇子邕王諒等七人爲王兼卿監祭酒秋七月諸道民不堪勾檢稅外物罷之庚戌邠寧軍亂惲帥張獻甫嚴威脇監軍楊明義請以范希朝代之都虞候陽朝晟斬亂首二百餘衆方定朝命以希朝副獻甫乙亥自陝州至河陰水色如墨流入汴口一宿而復又汴鄭管內烏皆入田緒李納之境卽柴爲城方十餘里高二三尺惡而去之信宿復至口咸流血八月甲午京師地震其聲如雷九月丙午賜百寮宴錢選勝爲樂癸丑御製曲江亭重陽賜宴詩六韻羣臣畢和冬十月詔宰臣選常叅官會爲牧宰有理行者秦于頔董晉等十二人俱於左右丞廳親試政要而後用之韋

臯聞吐蕃將寇西川遣書敘述雲南歸化之誠前此雖稱內附猶不敢與絕及是始相疑貳遣兵屯會川以塞其趨蜀之路要大臣子弟爲質雲南益怒歸志愈堅吐蕃兵勢始弱丙戌賜右神策將軍李長榮名元以爲河陽三城懷州團練使戊子廻紇公主來迎咸安公主命尚書闊播送歸十二月上因泌奏徐州隣近李納若復竊據恐失江淮請立爲節度使徙張建封往鎮仍割濠泗隸之

五年春正月壬辰朔日食二月乙卯中和節泌請令百官進農書司農獻種陸種王公戚里進春服士庶以刀尺相問遺村社祈穀祭勾芒神從之庚子必有疾薦董晉爲門下侍郎資叅中書侍郎並同平章事夏四月乙未蕭昕致仕給半祿料永爲常式五月戊辰宋州獻瑞麥一莖九岐者百餘本秋七月嗣祿王

湛然爲太子賓客遣使廻紇九月壬戌詔圖楷遂良至李晟等
二十七人於凌煙閣以繼國初功臣之後冬十月丙午韋皋與
東蠻合力大破吐蕃擒其將賊遮遮吐蕃挫銳竟復嵩州瓊州
自乾封中爲山賊所陷是歲嶺南節度使李復遣判官姜孟京
與崖州刺史張少遷攻拔之

六年春正月詔取岐州無憂王寺佛骨至禁中供養及送諸佛
寺瞻禮傾財巨萬乙亥送還本寺三月壬寅潭城自河中來朝
甲子日色如血無光夏四月京師淮南兩浙福建旱人皆渴乏
疫死者衆閏月戊午始雨五月丙寅朔御紫宸殿受朝上以一
陰生特新此制定以爲常冬十一月庚午日南至郊禮畢宣赦
賜立仗將士及諸軍綵帛是歲吐蕃陷北庭節度使楊襲古奔
西州廻紇大相頡干迦斯給殺襲古安西因復阻絕惟西州猶

同守廻紇亦爲吐蕃所逼取浮圖川乃遷部落羊馬於牙帳之南以避之

七年春正月蔡州置汝南縣黑衣大食遣使朝貢二月戊戌詔涇原劉昌築平涼故城以扼彈箠峽口分兵戍之又築胡谷堡賜名彰義自是涇原稍安邊患弭息三月辛巳詔神策六軍驍橫侵暴百姓詬辱官司毀裂案牘州縣不能治自今凡相訟者軍司推劾與百姓訟委府縣推劾若有凌忽禁身奏聞夏五月庚申朔上御宣政殿見百官辛未置柔遠軍爲安南都護府以虔州刺史趙昌領之羣蠻以安秋七月癸酉上幸章敬寺賦詩九韻皇太子與羣臣畢和八月庚戌夏州奏開延化渠引烏水入庫狄澤溉田二百頃九月吐蕃攻靈州廻紇敗之來獻俘冬無雪十月癸丑詔御延英令諸司官長二人奏本司事常參官

二人引對訪以政事謂之巡對十一月上聞吳湊爲治有聲欲遷之與竇參有憾毀以病風上名至京師步而察之乃知其誣擢爲陝虢觀察使自是惡參

八年春二月丁亥有男子持杖入含元殿擊損欄檻自稱許州人詔誅之王寅雲南路絕復通三月乙丑竇參薦班宏判度支張滂爲戶部侍郎領諸道鹽鐵轉運上乃遵大曆故事命分東都河南淮南江南嶺南山南東道令滂主之河內河東劔南山南西道令宏主之又察知左金吾大將軍嗣虢王則之與竇申及吳通玄共作謗書傾陸贄夏四月戊子口授李翰金吾衛大將軍便令上事翌日除書方下乙未參及則之通玄與諸竇皆貶尋賜死而用趙憬陸贄並爲中書侍郎同平章事五月丙辰初增京兆青苗畝三錢以給掌閑驥已未從二相請諫議郎

官御史不宜專拘務令尚書丞郎各舉其可併具舉主官名異
日考課一併陞黜秋七月贊奏湖南觀察李巽以代班宏上許
之既而自用司農少卿裴延齡判度支贊固諫不從是秋大雨
河南北江淮荆襄陳許四十餘州災遣中書舍人奚陟等諸道
宣撫賑貸贊奏今歲江淮湖浙運米至河陰太倉積有數多請
減明年所運四分之三於水災州縣糶與貧民收其錢於邊鎮
和糴以補缺數尚遺緡錢留充來年和糴之本詔行其策邊儲
浸充八月丁未罷重陽賜宴九月丁巳韋臯攻吐蕃維州獲蕃
將諭莽熱以獻冬十一月壬子朔日食庚午嚴震奏破吐蕃於
芳州及黑水堡時神策兩軍所募多負販子弟大將軍柏良器
漸以才勇士更之監軍竇文瑒惡其異已除爲右領軍自此宦
官始專軍政

九年春正月庚辰朔朝賀畢上賦退朝觀仗歸營詩癸卯張滂
初奏權收茶稅甲寅禁銷錢爲銅器其有產于山者聽人開採
無得私賣初鹽州旣陷塞外無復保障吐蕃常阻絕靈武侵擾
鄜坊二月辛酉詔發兵三萬五千城鹽州命節度使杜彥光入
守之靈夏河西獲安夏四月辛酉地震有聲如雷河中關輔尤
甚壞城壁廬舍地裂水涌五月甲辰趙憬轉門下侍郎賈耽與
左丞盧邁並同平章事乙巳韋臯遣將由西山破吐蕃峨和定
兼二城及通鴉軍凡平堡五十餘所獻俘加檢校右僕射時四
相並任百寮關白相讓不言秋七月詔依至德故事相迭秉筆
旬日一易其後日一易之劍南西山羌女國王湯立志哥鄰王
董臥庭白徇王羅陀念弱水王董避和逋租王鄧告知南水王
尚悉囊六國君長初附吐蕃自韋臯捷後皆內附親來朝貢各

授官勅遣之異牟尋三使上表願棄吐蕃歸唐詔令韋舉慰諭
癸卯裴延齡進羨餘上寵信之以爲戶部侍郎權德輿奏其欺
罔不聽八月庚戌李晟薨罷重陽宴已巳納皇孫廣陵王妃郭
氏冬十月己酉馬燧入對延英足疾不拜上愀歔泣下曰前日
與晟俱來今獨至命宦者扶持送至及階十一月乙酉日南至
圓丘大赦辛卯李元諒卒以部將阿史那敘統其衆戍良原城
甲辰令於都堂訪尚書丞郎以理術并試時務狀考其通否及
歷任考課事迹定爲三等并舉主姓名仍令御史監試授官後
政事能否委御史臺觀察使以聞十二月丙辰汴州還劉士寧
以通王誼遙領宣武軍節度大使李萬榮爲留後

十年春正月乙酉杜希全卒命虔王諒遙領朔方靈鹽豐州節
度副大使行軍司馬李纘爲留後二月乙丑李融卒以華州李

復爲義成軍節度使三月乙亥黃霧四塞日無光滄州程懷直
來朝厚賜遣還庚辰異牟尋大破吐蕃於神川拔鐵橋以束城
壘十六擒其王五人降民衆十萬口遣使高緡龍告捷以爲左
武衛將軍壬申轉同州盧徵爲華州刺史潼關防禦鎮國軍等
使辛丑賜延州刺史李如遜所部蕃落名安塞軍以爲軍使夏
四月太白晝見戊辰及癸酉地震六月壬寅朔李抱真卒邕
王諒兼領昭義軍節度使都虞候王延貴爲留後賜名虔休授
朔州將元誼饒州刺史不奉詔陰結田緒據洺州以叛乃詔虔休
自將討之丙寅韋臯奏破吐蕃城柵獻所斬首二千八百級辛
未晦有木鳥集於左藏庫是夜暴雨大風折木秋七月異牟尋
遣弟湊羅棟來朝獻地圖土貢及原受吐蕃金印請復號南詔
遣中丞袁滋賜以銀窠金印文曰貞元冊南詔印欽州蠻酋黃

少卿反攻邕管陷欽橫潯貴等州九月辛未朔以袁州刺史董鎮爲邕管經略使以代孫公器裴延齡取左藏庫見在申奏銀三十萬兩段匹雜貨百萬以爲糞土棄物請悉移入雜庫以供別勅支用太府少卿韋少華抗表請加推驗上不信冬十月癸卯親試賢良方正能直言極諫舉人十一月乙酉張滂罷以浙西觀察使王緯爲諸道鹽鐵轉運使帝性猜忌好取辦給遠敦實延齡投其所好陸贄上疏極論其姦縷數罪惡上不悅待之加厚延齡口短贄於上十二月壬戌降爲太子賓客十一年春正月乙亥薛珏卒以黔中經略王鐸爲廣州刺史嶺南節度使祕書少監王礎代之二月乙巳開大欽茂子嵩爲渤海郡王乙卯置潘原縣三月丙申諸州薦隱居丘園不求聞達蔡廣成等九人給公乘到京各授試職夏四月旱延齡奏贄等

怨望貶爲忠州別駕京兆李充衛尉張滂司農李鉅皆以黨費
各貶涪汀邵三州長史癸亥諫議陽城率拾遺王仲舒歸登補
闕熊執易相邪守延英門上疏論延齡奸佞贊等無罪上大怒
欲加罪賴太子營救意解上意欲相延齡城欲取白麻當延獎
之金吾將軍張萬福賀於朝上意方止甲子賜南詔勅書始復
舊制列中書三官奉旨宣行丙寅兩州劉濟大破奚王聚刺等
六萬餘衆來奏五月丁丑命李萬榮王虔休李樂皆知本軍節
度事甲申李自良卒以通王譙兼領河東監軍王定遠辭以司
馬李悅知州後事悅深德定遠請鑄監軍印給之自此監軍始
有印聞八月己丑國子司業裴澄表上乘輿月令并理典各十
二卷九月丁巳加韋臯統押近界諸蠻及山西八國雲南安撫
等使冬十月滄州逐程懷直命虔王諒兼領海軍節度大使

以懷信爲留後十一月丙申日南至以馬燧葬不受朝賀十二月戊辰上獵苑中行三驅禮勞士而還

十二年春正月庚子元誼東奔田緒朝廷不問乙丑加渾瑊王武俊中書令嚴震田緒劉濟韋臯同平章事悉授天下方鎮檢校官以悅其意上制貞元廣利藥方頒降天下三月甲午韋臯奏收降蠻高萬唐等七千戶口二萬餘乙巳拜李齊運裴延齡禮戶二部尚書上有所除授遣中使就問之夏四月庚辰上誕日參以四門博士韋渠牟討論三教上悅其談辨於是有寵六月乙丑初置左右神策左右神威護軍中尉監以賁文瑒霍僊鳴張尚進焦希望領之兵權悉歸宦豎迄於亡唐上自還京以來以奉天窘乏專意聚斂藩鎮多進奉市恩江西李兼月進西川韋臯日進常州刺史濟源裴肅判官嚴綬皆以刻剝進奉遷

浙東觀察使并刑部員外郎秋八月辛未朔日食九月丙午裴
延齡卒中外相賀上獨惜之以所薦諫議大夫崔損給事中趙
宗儒並同平章事賜金紫自陸贄貶後中外官皆上自選用不
任宰相中書惟涉文移所取信惟延齡齊運王名李實韋執誼
及渠牟皆權傾宰相趨附盈門庚戌幸魚藻宮壬子吐蕃寇慶
州冬十月壬戌京畿旱詔放租稅十二月癸未廻紇南詔劍南
西山女國王並來朝貢

十三年春正月命邠寧節度使楊朝晟築方渠合道木波三城
以過吐蕃要路二月分軍爲三各築一城三月功完夏四月庚
申還至馬嶺遇吐蕃出兵來拒相持數日旣去復城馬嶺而還
乙丑大雪五月丙戌朔韋臯收復嵩州生擒大龍官盡回來上
六月辛巳引龍首渠水自通化門入至太清宮前秋七月乙未

地震九月甲辰陞定州爲大都督府冬十月癸丑朔宮市行以
宦官爲使置白望數百人於兩市及要鬧坊曲率用直百錢物
買人直數千物又染故衣敗絳爲紅紫尺寸裂而給之仍索進
奉及脚價錢人將物詣市至空手而歸商賈良貨皆深藏之丁
丑徐泗節度張建封來朝具奏其弊上以問戶部侍郎判度支
蘇弁弁希宦官意對以長安無土著生業仰生活者萬家上信
之故凡言宮市者皆不聽是歲淮西吳少誠擅開木刀溝入于
汝水

十四年春正月庚寅放除貞元八年至十一年州府兩稅及權
酒錢甲午建封奏罷朝官私相過從金吾不須上聞二月乙亥
賜中光蔡節度名曰彰義軍三月丙申邢君牙卒以右神策將
軍張昌爲鳳翔尹改名敬則夏四月乙丑宰相崔損修奉八陵

畢工羣臣稱賀五月丙午貶蘇弁汀州兄袁永州皆司戶特旨
度支郎中于頔令判度支賜金紫閏月庚申遷左神策行營韓
全義夏州刺史兼鹽夏綏銀節度使以代韓潭全義時屯長武
城帥其衆赴鎮士卒不樂徙作亂殺大將王栖巖都虞候高崇
文誅亂首衆方定丙子拜崇文長武城都知兵馬使不降勅令
中使口宣授之秋七月乙卯貶韓臯撫州士曹召右金吾將軍
吳湊面授京兆尹卽令入府視事湊屢言宦官宮市歸其過於
右金吾都知趙洽田秀嵩上流之天德軍王申趙宗儒罷崔損
爲門下侍郎鄭餘慶中書侍郎同平章事己卯初置左右神策
行營統軍諸將戍邊多遙領之虞賜優厚衆至十五萬人九月
己酉吳少誠叛遣兵攻掠壽州霍山殺鎮遏使謝詳侵地二十
餘里置兵鎮守冬十月庚子韓全義奏破吐蕃于鹽州西北十

一月己未韋臯進狀敘開復南詔之由卒禍唐室十二月己亥南詔遣使賀正旦明州鎮將栗鍠殺刺史盧雲作亂攻陷浙東州縣冬無雪京師河南皆饑山太倉東都聚以賑貧民

十五年春二月乙酉汴州軍亂殺節度使陸長源及判官孟叔度王顏監軍俱文珍招宋州刺史劉逸準入城靖亂卽拜爲節度使賜名全諒李齊運薦常州李錡充浙西觀察諸道鹽鐵轉運等使刻意進奉上悅之三月甲寅吳少誠寇唐州殺監軍名國朝掠居民壬申於易州滿城縣置永清軍夏四月丁丑旱祈雨壬午增置內侍省內給事二員六月癸巳嚴震卒遺表薦都虞候嚴礪爲興元尹諫議大夫苗拯左拾遺李繁私議除拜不當外貶萬州刺史播州叅軍秋七月鄭滑大水丙午賜故唐安公主諡曰莊穆公主賜諡始此丁未王礎卒廢朝一日

觀察使
裴朝亦

始八月丙申吳少誠進圍許州節度使上官浣欲棄城走營田副使劉昌裔止之鑿城出擊破其軍城乃得全戊戌下詔削少誠官爵令諸道進討辛酉劉全諒卒以都知兵馬使韓弘爲宣武軍節度使選卒三千會討少誠冬十一月乙巳冬至以兵興罷朝會壬子襄州于頔奏破淮南賊于朗山時淮西諸將出兵不立統帥人自窺利乙未諸軍自潰于小泖水

十六年春二月己酉竇文場薦韓全義爲蔡州行營招討使上官浣副之十七道兵皆受節制于頔因討少誠大募戰士繕甲兵有據漢南之意上方姑息藩鎮知而不問夏四月丁亥黔中知宴設吏傳近逐觀察使韋士宗已而復入義成監軍薛盈珍欲奪節度使姚南仲軍政不與有隙詔徵還南仲亦請入朝罷爲右僕射以行軍司馬盧羣代爲義成軍節度使五月庚戌韓

全義與少誠戰於潞水南敗績退保五樓張建封病篤請代命
蘇州刺史章夏卿爲行軍司馬徐州軍亂不納迫其子愔爲留
後上遣李鄴宣慰之六月丙午加淮南杜祐同平章事兼領徐
泗濠節度張愔爲徐州留後兼團練使秋九月盧羣平賈耽言
于上請自朝廷除授庶無他變若就軍中除拜必有愛憎向背
乃以左丞李元素代爲義成軍節度使庚戌上疑鄭餘慶朋比
于頔貶爲郴州司馬以齊抗爲中書侍郎同平章事癸酉吳少
誠進逼潞水全義退保陳州諸將散還官軍不振冬十月少誠
引歸蔡州上表待罪戊子詔雪少誠復其官十二月戊寅罷吏
部復考判官及禮部別項貢舉

十七年春正月甲寅韓全義自蔡州行營還竇文瑒掩其敗迹
上禮遇甚厚詔令還鎮三月己巳韋士宗復被逐以諫議大夫

裴佖代之癸酉詔御史按問衢州刺史鄭式贍賊犯以進銀絹
七千匹兩令付左藏庫五月壬戌朔日食乙酉楊朝晟卒以兵
馬使高固爲邠寧節度使六月戊戌竇文瑒致仕副使楊志廉
代之丁巳起復王武俊子士貞恆州長史成德軍節度使秋七
月戊寅吐蕃寇鹽州刺史杜彥先委城奔慶州己丑又陷麟州
殺刺史郭鋒毀城壘而去九月壬戌韋臯大破吐蕃於雅州遂
圍維州及昆明城轉戰千里凡拔城七軍鎮五焚堡百五十

十八年春正月戊午朔大雨雪罷朝賀乙丑驃國王摩羅思那
遣其子悉利移因南詔來朝貢乙亥吐蕃遣大相論莽熱將兵
救維州韋臯據險設伏獲之獻于朝上赦其罪三月癸酉浙東
團練副使齊總以橫賦希恩進奉擢爲衢州刺史又以徐申遷
嶺南節度掌書記張正元爲邕管經略使給事中許孟容皆封

還制書秋七月詔公卿庶僚勿令正衙奏事自武德以來皆踵
行其後遂廢冬十月己酉王栖霞率中軍將何朝宗夜縱火作
亂都虞候裴玢擒斬之十一月丙辰以玢爲行軍司馬同州刺
史劉公濟爲郿坊丹延節度使十二月戊申黎州蠻牂何使入
朝

十九年春二月丁亥賜安黃節度曰奉義軍己亥安南州將王
季元逐經略使裴泰兵馬使趙勻斬季元復之甲辰杜祐來朝
命王錡代之三月丁卯詔今歲孟夏禘饗正太祖東向之位己
下序昭穆其獻饗二祖祔于德明興聖之廟每禘祫就本室饗
之乙亥監察御史韓愈奏歲饑百姓窮困一應租稅并草粟等
請俟來春蠶麥京兆尹李實怒之貶爲陽山令在朝士大夫畏
之皆側目夏四月乙未從涇原劉昌請徙原州治平涼五月乙

亥吐蕃論頻熱來朝自正月至是不雨分命祈禱山川秋七月
戊午關輔饑罷吏部選禮部貢舉甲戌始雨八月乙未大雨霖
冬十一月戊寅朔兵馬使李興幹爲鹽州刺史許專達于上不
隸夏州丙午范希朝來朝以行軍司馬闕巨源兼單于大都護
振武麟勝節度使庚申高郢爲中書侍郎鄭珣瑜門下侍郎並
同平章事

二十年春二月丙午朔歲儉罷中和節宴庚戌大雷震雨雹三
月甲申吐蕃贊普卒廢朝弔祭夏四月丙寅吐蕃使論乞毋等
來朝貢賜陳許節度號忠武軍秋七月辛卯福建觀察使柳冕
奏立萬安監牧置群牧五於泉州界悉索部內馬牛羊主之九
月太子得風疾始不能言冬十月甲辰景州南皮縣置唐昌軍
辛亥張茂昭來朝十一月丁酉以監察御史李程秘書正字張

韋蓋田縣尉王涯浙東觀察判官凌準並爲翰林學士十二月吐蕃南詔日本國遣使朝貢

二十一年春正月辛未朔御含元殿受朝貢帝體不康癸巳遂崩於會寧殿臨御二十有六年壽六十四諡曰神武孝文皇帝廟號德宗

冊曰曠盈害忠猜忌害智奸貪邪諂欣與爲類式微中露王無罪歲一言而善四海鼎沸猗社稷臣天開日麗